

Na osnovu člana 25. stav 1. alineja 2. i člana 32. stav 1. alineje 2, 3, 4 i 5. Zakona o građevinskim proizvodima (»Službene novine Federacije BiH«, broj 78/09), Federalno ministarstvo prostornog uređenja d o n o s i

## PRAVILNIK O OCJENJIVANJU USKLAĐENOSTI GRAĐEVINSKIH PROIZVODA

### I. OPĆE ODREDBE

#### Član 1.

Ovim Pravilnikom propisuju se metode vrednovanja rezultata i drugi zahtjevi vezani za postupke ocjenjivanja usklađenosti, dokumente i radnje ocjenjivanja usklađenosti, te sisteme ocjenjivanja usklađenosti građevinskih proizvoda, pobliže uslove za izdavanje dokumenata o usklađenosti, sadržaj dokumenata o usklađenosti i način vođenja i sadržaj evidencije izdatih dokumenata o usklađenosti.

#### Član 2.

Pojedini pojmovi upotrijebljeni u ovom Pravilniku imaju sljedeće značenje:

1) *ovlašteno pravno lice* za ocjenjivanje usklađenosti je pravno lice koja ima ovlaštenje Federalnog ministarstva prostornog uređenja (u daljem tekstu: Ministarstvo) za provođenje dijela ili svih radnji ocjenjivanja usklađenosti, izdavanje certifikata o fabričkoj kontroli proizvodnje i/ili za izdavanje certifikata o usklađenosti građevinskog proizvoda, u skladu sa odredbama Pravilnika o uslovima za lica koja provode radnje ocjenjivanja usklađenosti građevinskih proizvoda ("Službene novine Federacije BiH", broj 49/10),

2) *odgovorna osoba* je zaposlenik ovlaštenog pravnog lica za ocjenjivanje usklađenosti koji je imenovan kao osoba odgovorna za provođenje radnji ispitivanja građevinskog proizvoda, radnji nadzora proizvodnje građevinskog proizvoda ili za izdavanje certifikata o usklađenosti,

3) *certifikat o fabričkoj kontroli proizvodnje* je potvrda o usklađenosti fabričke kontrole proizvodnje građevinskog proizvoda s uslovima za fabričku kontrolu proizvodnje određenom tehničkom specifikacijom za taj proizvod,

4) *certifikat o usklađenosti* je potvrda o usklađenosti građevinskog proizvoda s tehničkom specifikacijom,

5) *izjava o usklađenosti* je izjava o usklađenosti građevinskog proizvoda s tehničkom specifikacijom,

6) *ovlaštenje* je rješenje kojim federalni ministar prostornog uređenja (u daljem tekstu: ministar) pravnom licu odobrava provođenje radnji ocjenjivanja usklađenosti, izdavanje certifikata o fabričkoj kontroli proizvodnje i/ili za izdavanje certifikata o usklađenosti građevinskog proizvoda, u skladu sa odredbama Pravilnika o uslovima za lica koja provode radnje ocjenjivanja usklađenosti građevinskih proizvoda ("Službene novine Federacije BiH", broj 49/10),

7) *područje proizvoda* je područje upotrebe građevinskih proizvoda koji su srodni po namjeravanoj upotrebi i svojstvima određeno posebnim propisom.

Pojmovi: tehnička specifikacija, građevinski proizvod, fabrika, proizvođač, uvoznik i ovlašteni zastupnik imaju značenje određeno Zakonom o građevinskim proizvodima.

## II. OCJENJIVANJE USKLAĐENOSTI GRAĐEVINSKIH PROIZVODA

### Član 3.

Poslovi i radnje ocjenjivanja usklađenosti građevinskih proizvoda obavljaju se u skladu sa Zakonom o građevinskim proizvodima i ovim Pravilnikom, tehničkim specifikacijama, odredbama odgovarajuće norme iz člana 3. odnosno 4. Pravilnika o uslovima za lica koja provode radnje ocjenjivanja usklađenosti građevinskih proizvoda ("Službene novine Federacije BiH", broj 49/10), po kojoj je dobijeno ovlaštenje, te u skladu s pravilima struke, a dokumentiranje tih poslova i radnji provodi se u skladu s propisima o kancelarijskom poslovanju.

### Član 4.

U postupku ocjenjivanja usklađenosti građevinskog proizvoda provode se radnje ispitivanja građevinskog proizvoda i radnje nadzora proizvodnje građevinskih proizvoda.

Radnje ispitivanja građevinskog proizvoda su:

- 1) početno ispitivanje tipa građevinskog proizvoda koje provodi proizvođač, odnosno početnog ispitivanja tipa građevinskog proizvoda od strane ovlaštenog pravnog lica za ocjenjivanje usklađenosti,
- 2) ispitivanje uzoraka iz proizvodnje prema utvrđenom planu ispitivanja od strane proizvođača ili ovlaštenog pravnog lica za ocjenjivanje usklađenosti, i
- 3) ispitivanje slučajnih uzoraka uzetih iz proizvodnje iz grupe pripremljene za isporuku, odnosno na tržištu ili na gradilištu iz isporučene grupe od strane ovlaštenog pravnog lica za ocjenjivanje usklađenosti.

Radnje nadzora proizvodnje građevinskog proizvoda su:

- 1) stalna fabrička kontrola proizvodnje koju provodi proizvođač,
- 2) početni nadzor fabrike i početni nadzor fabričke kontrole proizvodnje koju provodi ovlašteno pravno lice za ocjenjivanje usklađenosti, i
- 3) stalni nadzor, procjena i ocjenjivanje fabričke kontrole proizvodnje koju provodi ovlašteno pravno lice za ocjenjivanje usklađenosti.

### Član 5.

Radnjama ispitivanja građevinskih proizvoda utvrđuju se tehnička svojstva građevinskih proizvoda.

Nadzor proizvodnje građevinskih proizvoda provodi se pregledavanjem, nadziranjem i ocjenjivanjem proizvodnje i stalne fabričke kontrole proizvodnje.

O provedenim radnjama iz stava 1. i 2. ovoga člana i rezultatima tih radnji ovlašteno pravno lice odnosno proizvođač izdaje odgovarajući dokument i to o:

- 1) radnjama ispitivanja građevinskog proizvoda izdaje izvještaj o ispitivanju građevinskog proizvoda,
- 2) provođenju stalnog nadzora, procjeni i ocjenjivanju fabričke kontrole proizvodnje izdaje izvještaj o provedenom nadzoru,
- 3) provedenom početnom nadzoru fabrike i početnom nadzoru fabričke kontrole proizvodnje izdaje izvještaj o provedenom početnom nadzoru.

Certifikat o fabričkoj kontroli proizvodnje izdaje se za sisteme ocjenjivanja usklađenosti 2 i 2+, na osnovu pozitivnih izvještaja iz stava 3. alineja 2. i/ili 3. ovoga člana.

#### Član 6.

Obavljanje poslova izdavanja certifikata o usklađenosti obuhvata provedbu radnji ocjenjivanja usklađenosti građevinskih proizvoda, vrednovanje i/ili završno ocjenjivanje rezultata radnji ocjenjivanja usklađenosti (potvrđivanje) i izdavanje certifikata o usklađenosti.

Vrednovanje i/ili završno ocjenjivanje rezultata radnji ocjenjivanja usklađenosti provodi se pregledom izvještaja o ispitivanju građevinskog proizvoda te pregledom izvještaja o provedenom nadzoru i o provedenom početnom nadzoru fabričke kontrole proizvodnje.

Ovlašteno pravno lice za izdavanje certifikata o usklađenosti obavezno je vrednovati i završno ocjenjivati rezultate radnji ocjenjivanja usklađenosti građevinskih proizvoda nezavisno o tome je li ih provelo samo ili su je provela druga ovlaštena pravna lica za provođenje tih radnji.

#### Član 7.

U postupku ocjenjivanja usklađenosti građevinskog proizvoda moraju se provesti grupe radnji označene kao sistemi ocjenjivanja usklađenosti 1+, 1, 2+, 2, 3 i 4 određene u tabeli koja je prilog 1. i sastavni je dio ovoga Pravilnika, i to:

- 1) prije izdavanja certifikata o usklađenosti – grupe radnji označene kao sistemi ocjenjivanja usklađenosti oznake 1+ i 1;
- 2) prije izdavanja certifikata o fabričkoj kontroli proizvodnje – grupe radnji označene kao sistemi ocjenjivanja usklađenosti oznake 2+ i 2;
- 3) prije izdavanja izjave o usklađenosti – grupe radnji označene kao sistemi ocjenjivanja usklađenosti oznake 1+, 1, 2+, 2, 3 i 4.

Metode vrednovanja rezultata koje se u postupku ocjenjivanja usklađenosti moraju provesti za pojedini građevinski proizvod, odnosno pojedinu grupu građevinskih proizvoda, prije izdavanja certifikata o usklađenosti i izjave o usklađenosti, određeni su tehničkom specifikacijom.

#### Član 8.

Certifikat o usklađenosti izdaje ovlašteno pravno lice za ocjenjivanje usklađenosti na zahtjev proizvođača ili uvoznika građevinskog proizvoda, materijala i opreme ako su provedeni i/ili se provode skupine radnji određene za ocjenjivanje usklađenosti građevinskog proizvoda, materijala i opreme, za koji se izdaje certifikat o usklađenosti, te ako je usklađenost dokazana.

Certifikat o usklađenosti mora biti na bosanskom ili hrvatskom ili srpskom jeziku i latiničnom ili ćiriličnom pismu. Certifikat o usklađenosti obavezno sadrži:

- 1) naziv i sjedište ovlaštenog pravnog lica za ocjenjivanje usklađenosti koje je izdalo certifikat o usklađenosti građevinskog proizvoda, materijala i opreme,
- 2) klasu, broj i datum ovlaštenja za obavljanje poslova izdavanja certifikata usklađenosti ovlaštenog pravnog lica koje je izdalo certifikat,
- 3) evidencijski broj ovlaštenog pravnog lica,
- 4) naziv i sjedište, odnosno ime i adresu proizvođača ili uvoznika,

- 5) naziv, kratki opis i namjenu građevinskog proizvoda, materijala i opreme,
- 6) oznaku tehničkih specifikacija koje su mjerodavne za ocjenjivanje usklađenosti građevinskog proizvoda, materijala i opreme,
- 7) oznaku sistema ocjenjivanja usklađenosti koji je proveden ili se provodi,
- 8) naziv i sjedište ovlaštenih pravnih lica za ocjenjivanje usklađenosti koja su učestvovala u ocjeni usklađenosti, te klasu, broj i datum ovlaštenja za obavljanje tih poslova,
- 9) klasa, broj i datum izdavanja certifikata o usklađenosti i rok njegovog važenja,
- 10) ime, prezime i potpis odgovornog lica za izdavanje certifikata o usklađivanju,
- 11) evidencijski broj ovlaštenog pravnog lica za ocjenjivanje usklađenosti te klasu, broj i datum izdavanja dokumenata o ocjenjivanju usklađenosti na osnovu koje se izdaje certifikat.

Certifikat o usklađenosti trajno čuva tijelo koje ga je izdalo, te proizvođač ili uvoznik.

Nakon izdavanja certifikata o usklađenosti, ovlašteno pravno lice za ocjenjivanje usklađenosti o tome obavještava Ministarstvo i Federalnu upravu za inspekcijske poslove.

#### Član 9.

Proizvođač izdaje izjavu o usklađenosti ako:

- 1) zadovoljava uvjete iz člana 15. stav 1. Pravilnika o uslovima za lica koja provode radnje ocjenjivanja usklađenosti građevinskih proizvoda ("Službene novine Federacije BiH", broj 49/10),
- 2) su provedene i/ili se provode skupine radnji određene za ocjenjivanje usklađenosti,
- 3) je utvrdio da je usklađenost dokazana.

Ovlašteni zastupnik izdaje izjavu o usklađenosti ako:

- 1) proizvođač kojeg zastupa zadovoljava uslove iz člana 15. stav 1. Pravilnika o uslovima za lica koja provode radnje ocjenjivanja usklađenosti građevinskih proizvoda,
- 2) su provedene i/ili se provode skupine radnji određene za ocjenjivanje usklađenosti,
- 3) je proizvođač utvrdio da je usklađenost dokazana.

#### Član 10.

Izjavom o usklađenosti proizvođač, ovlašteni zastupnik odnosno uvoznik potvrđuje da su provedene i/ili da se provode skupine radnji određene za ocjenjivanje usklađenosti građevinskog proizvoda, materijala i opreme za koji se daje izjava, te da je dokazana usklađenost građevinskih proizvoda, materijala i opreme s tehničkom specifikacijom.

Izjava o usklađenosti mora biti na bosanskom ili hrvatskom ili srpskom jeziku i latiničnom ili ćiriličnom pismu.

Izjava o usklađenosti obavezno sadrži:

- 1) naziv i sjedište, odnosno ime i adresu proizvođača ili uvoznika, odnosno naziv i sjedište (ime i adresu) proizvođača u slučaju da izjavu o usklađenosti izdaje ovlašteni zastupnik ili uvoznik,
- 2) naziv, kratki opis i namjenu građevinskog proizvoda, materijala i opreme,
- 3) izjavu da je građevinski proizvod, materijal i oprema usklađen sa tehničkom specifikacijom određenom za taj proizvod, materijal i opremu,
- 4) oznaku tehničkih specifikacija koje su mjerodavne za ocjenjivanje usklađenosti građevinskog proizvoda, materijala i opreme,

- 5) oznaku sistema ocjenjivanja usklađenosti koji je sproveden ili se sprovodi,
- 6) naziv i sjedište tijela za ocjenjivanje usklađenosti koja su učestvovala u ocjeni usklađenosti, te klasu, broj i datum ovlaštenja za obavljanje tih poslova,
- 7) klasu, broj i datum izdavanja izjave,
- 8) ime, prezime, svojstvo i potpis lica koje je ovlašteno za potpisivanje u ime proizvođača ili uvoznika građevinskog proizvoda, materijala i opreme.

Izjavu o usklađenosti trajno čuva proizvođač, ovlašteni zastupnik ili uvoznik.

Nakon izdavanja izjave o usklađenosti, proizvođač, ovlašteni zastupnik odnosno uvoznik o tome obavještava Ministarstvo i Federalnu upravu za inspekcijske poslove.

### III. PRELAZNE I ZAVRŠNE ODREDBE

#### Član 11.

Ministarstvo vodi evidenciju ovlaštenih pravnih lica.

Ministarstvo vodi evidenciju izdatih certifikata o usklađenosti.

Ovlašteno pravno lice koja je izdalo certifikat o usklađenosti dužno je isto dostaviti Ministarstvu u roku od 15 dana od dana njegovog izdavanja.

Podaci o evidentiranim certifikatima o usklađenosti, iz kojih su vidljivi osnovni podaci o proizvodu, objavljuju se na web-stranici Ministarstva.

#### Član 12.

Danom stupanja na snagu ovoga Pravilnika prestaje važiti Pravilnik o certifikaciji građevinskih proizvoda, materijala i opreme koji su u upotrebi odnosno koji se ugrađuju ("Službene novine Federacije BiH", broj 23/09).

#### Član 13.

Ovaj Pravilnik stupa na snagu narednog dana od dana objave u "Službenim novinama Federacije BiH".

Broj: 01-02-3-1463/10

Sarajevo, 21. decembra 2010. godine

Po ovlaštenju  
Vlade Federacije BiH  
Premijer

Mustafa Mujezinović, s.r.

## PRILOG 1.

Tabela grupa radnji koje se provode u pojedinom sistemu ocjenjivanja usklađenosti

DOKUMENT O USKLAĐEN OSTI	SISTEM OCJENJIVANJA USKLAĐENOSTI	radnju provodi proizvođač			radnju provodi ovlašteno pravno lice			
		stalna fabrička kontrola proizvodnje	ispitivanje uzoraka iz proizvodnje prema utvrđenom planu ispitivanja	početno ispitivanje tipa građevinskog proizvoda	početno ispitivanje tipa građevinskog proizvoda	početni nadzor fabrike i početni nadzor fabričke kontrolne proizvodnje	stalni nadzor, procjena i ocjenjivanje fabričke kontrolne proizvodnje	ispitivanje slučajnih uzoraka uzetih iz proizvodnje iz propisanih grupa
C + I	1+	•	•			•	•	•
	1	•			•	•	•	
I	2+	•	•	•		• <sup>a)</sup>	• <sup>a)</sup>	
	2	•		•		• <sup>a)</sup>		
	3	•			•			
	4	•		•				

C = certifikat o usklađenosti

I = izjava o usklađenosti

• označava radnju koju je obavezan provesti ili provoditi proizvođač odnosno ovlašteno pravno lice u pojedinom sistemu ocjenjivanja usklađenosti

<sup>a)</sup> ovlašteno pravno lice izdaje certifikat o fabričkoj kontroli proizvodnje